

SONLI KETMA-KETLIKLER VA ULARNING LIMITI

18-§. Sonli ketma-ketlik tushunchasi. Ketma-ketlik limitining ta'rifi

Reja:

1. Sonli ketma-ketlik tushunchasi.

2. Ketma-ketlikning berilish usullari.

3. Ketma-ketlik limitining ta'rifi.

4. O'z-o'zini tekshirish savollari.

5. Mustaqil yechish uchun misollar.

1. Sonli ketma-ketlik tushunchasi. Agar har bir natural son n ga biror haqiqiy x_n soni mos qo'yilgan bo'lsa, u holda

$$x_1, x_2, x_3, \dots, x_n, \dots$$

ketma-ketlik (sonli ketma-ketlik) berilgan deyiladi.

Ketma-ketlik qisqacha $\{x_n\}$ shaklda yoziladi. x_n ga ketma-ketlikning hadi (n -hadi) yoki elementi (n –elementi) deyiladi. n ga x_n -hadning nomeri deyiladi.

Sonli ketma-ketlik bu aniqlanish sohasi natural sonlar to'plamidan iborat bo'lgan funksiyadir. Bu funksiyaning o'zgarish sohasi, ya'ni $x_n (n \in N)$ sonlar to'plami ketma-ketlikning qiymatlari to'plami deyiladi. Ketma-ketlikning qiymatlari to'plami chekli yoki cheksiz bo'lishi mumkin, ammo ketma-ketlikning hadlari (elementlari) to'plami hamma vaqt cheksiz to'plamdir, chunki ketma-ketlikning 2 ta hadi bir-biridan hech bo'lmaganda nomeri bilan farq qiladi, masalan; $\{(-1)^n\}$ ketma-ketlikni qaraylik. Bu ketma-ketlikning qiymatlari to'plami 1 va -1 sonlaridan iborat. Uning hadlari to'plami cheksiz to'plamdir.

$\{n^2\}$ va $\{\frac{1}{n}\}$ ketma-ketliklarning qiymatlari to'plami cheksiz to'plam bo'ladi.

2. Ketma-ketlikning berilish usullari. Ketma-ketlik har bir hadining nomeri bo'yicha shu hadni hisoblash formulasi orqali berilishi mumkin.

Masalan:

$$x_n = \frac{1}{n}, x_n = \frac{(-1)^n + 1}{2}, x_n = \frac{n^2 + 1}{n}, x_n = 1 + 2 + \dots + n = \frac{n(n+1)}{2}.$$

Ketma-ketlik ba'zan rekurrent formula orqali berilishi mumkin:

a) Birinchi hadi beriladi (yoki dastlabki bir nechta hadi beriladi).

b) Ketma-ketlik hadining o'zidan oldingi hadiga (o'ziga qo'shni hadlariga) bog'lanish formulasi beriladi.

Masalan: $x_1 = 1, x_2 = 1, x_n = x_{n-1} + x_{n-2}, x_3 = x_2 + x_1 = 2, x_4 = x_3 + x_2 = 3, \dots$

Arifmetik va geometrik progressiyada ayirmasi d va maxraji q bo'lsa, ularning n –hadini topish formulasi rekurrent formula orqali berilgan ketma-ketlikka misol bo'la oladi:

$$a_{n+1} = a_n + d, \quad b_{n+1} = b_n q.$$

3. Ketma-ketlik limitining ta'rif.

18.1-ta'rif. Agar ixtiyoriy musbat ε soni uchun shunday $n_0(\varepsilon)$ nomer topilsaki, $n_0(\varepsilon)$ dan katta barcha $n \in N$ lar uchun $|x_n - a| < \varepsilon$ tengsizlik bajarilsa, a son $\{x_n\}$ ketma-ketlikning limiti deyiladi va $\lim_{n \rightarrow \infty} x_n = a$ kabi yoziladi yoki $n \rightarrow \infty$ da $x_n \rightarrow a$ deb belgilanadi.

Bu ta'rifni logik simvollar yodamida quyidagicha yozish mumkin:

$$\forall \varepsilon > 0, \exists n_0 \in N (n_0 = n_0(\varepsilon)), \forall n > n_0 \rightarrow |x_n - a| < \varepsilon$$

tengsizligi bajarilsa a soni $\{x_n\}$ ketma-ketlikning limiti deyiladi.

Demak,

$$\{\lim_{n \rightarrow \infty} x_n = a\} \Leftrightarrow \forall \varepsilon > 0, \exists n_0 \in N, \forall n > n_0 \rightarrow |x_n - a| < \varepsilon. \quad (18.1)$$

Agar ketma-ketlikning limiti mavjud bo'lsa, bu ketma-ketlik yaqinlashuvchi deyiladi.

Demak, yaqinlashuvchi ketma-ketlik logik simvollar orqali quyidagicha yoziladi:

$$\exists a \in R, \forall \varepsilon > 0, \exists n_0 \in N, \forall n > n_0 \rightarrow |x_n - a| < \varepsilon. \quad (18.2)$$

Bu munosabat bajarilsa $\{x_n\}$ ketma-ketlik yaqinlashuvchi deyilar ekan.

18.1-ta'rifning inkori logik simvollar yordamida quyidagicha yoziladi:

$$\exists \varepsilon_0 > 0, \forall n_0 \in N, \exists n > n_0, |x_n - a| \geq \varepsilon_0. \quad (18.3)$$

Ravshanki, (18.3) munosabat a son $\{x_n\}$ ketma-ketlikning limiti bo'lmashligini bildiradi.

Quyidagi

$$\forall a \in R, \exists \varepsilon_0 > 0, \forall n_0 \in N, \exists n > n_0, |x_n - a| \geq \varepsilon_0$$

munosabat esa $\{x_n\}$ ketma-ketlikning limitga ega emasligini, ya'ni bironta son bu ketma-ketlikning limiti bo'lmashligini bildiradi. Boshqacha aytganda, bu munosabat $\{x_n\}$ ketma-ketlikning yaqinlashuvchi emasligini anglatadi.

Yaqinlashuvchi bo'lmagan ketma-ketlik uzoqlashuvchi ketma-ketlik deyiladi.

Agar $\forall n$ da $x_n = a$ bo'lsa u holda $\{x_n\}$ ketma-ketlik statsionar ketma-ketlik deyiladi. Statsionar ketma-ketlik uchun

$$\lim_{n \rightarrow \infty} x_n = a$$

bo'ladi. (18.1) munosabatdan ko'rinadiki, $\lim_{n \rightarrow \infty} x_n = a$ bo'lsa, u holda

$\{x_n - a\}$ ketma-ketlikning limiti 0 bo'ladi, ya'ni $\lim_{n \rightarrow \infty} (x_n - a) = 0$, va aksincha $\lim_{n \rightarrow \infty} (x_n - a) = 0$ bo'lsa, u holda $\lim_{n \rightarrow \infty} x_n = a$ bo'ladi.

18.1-mashq. Agar $\lim_{n \rightarrow \infty} x_n = a$ $\lim_{n \rightarrow \infty} y_n = a$ bo'lsa, u holda $x_1, y_1, x_2, y_2, \dots, x_k, y_k, \dots$ ketma-ketlikning limiti ham a bo'lishini isbotlang.

Yana ta'rifga qaytib quyidagi mulohazalarni olamiz: $|x_n - a| < \varepsilon$ tengsizlik $a - \varepsilon < x_n < a + \varepsilon$ tengsizlikka ekvivalent. Ketma-ketlik limiti ta'rifidagi $a - \varepsilon < x_n < a + \varepsilon$ tengsizlikdan ko'rinadiki, agar a soni x_n ketma-ketlikning limiti bo'lsa, x_n ketma-ketlikning ma'lum bir nomerdan keyingi hadlarning barchasi $(a - \varepsilon, a + \varepsilon)$ intervalda yotadi. Bu interval tashqarisida yo elementi umuman bo'lmaydi, yo bo'lsa ham cheklita bo'ladi.

$(a - \varepsilon, a + \varepsilon)$ intervalga a nuqtaning ε -atrofi deyiladi va $U_\varepsilon(a)$ kabi belgilanadi:

$$U_\varepsilon(a) = \{x: a - \varepsilon < x < a + \varepsilon\} = \{x: |x - a| < \varepsilon\},$$

$$\begin{array}{c} \text{-----|-----|-----|-----} \\ a - \varepsilon \qquad \qquad a \qquad \qquad a + \varepsilon \end{array}$$

18.1-ta'rifni, ya'ni ketma-ketlik limitining ta'rifini quyidagicha ham ta'riflash mumkin.

a soni x_n ketma-ketlikning limiti deyiladi, agar a nuqtaning $\forall \varepsilon$ atrofida $\{x_n\}$ ketma-ketlikning cheksiz ko'p elementi joylashgan bo'lib, tashqarisida esa cheklita elementi qolgan bo'lsa. Logik simvollardan foydalanib ketma-ketlik limitini quyidagicha ham yozish mumkin:

$$\forall \varepsilon > 0, \exists n_0, \forall n > n_0 \rightarrow x_n \in U_\varepsilon(a)$$

18.1-misol. Limit ta'rifidan foydalanib, quyidagi ketma-ketlikning limitini toping:

$$x_n = \frac{1}{n}.$$

Yechish. $\lim_{n \rightarrow \infty} x_n = 0$ ekanligini ko'rsatamiz.

$$|x_n - 0| = \left| \frac{1}{n} - 0 \right| = \frac{1}{n}, \quad |x_n - 0| = \frac{1}{n}$$

bo'lganligi uchun $\frac{1}{n} < \varepsilon, n > \frac{1}{\varepsilon}$ tengsizlikdan n_0 nomerni $n_0 = \left[\frac{1}{\varepsilon} \right]$ deb olsak,

barcha $n > n_0$ larda $|x_n - 0| < \varepsilon$ tengsizlik bajariladi, bu esa

$\lim_{n \rightarrow \infty} x_n = 0$ ekanligini bildiradi.

Ketma-ketlik limiti mohiyatini chuqurroq tushuntirish uchun ε sonining turli qiymatlarida $\frac{1}{n} < \varepsilon$ tengsizlik bajarilishi uchun $n_0 = n_0(\varepsilon)$ natural sonini topib, ketma-ketlikning n_0 dan katta barcha hadlari 0 nuqtaning ixtiyoriy $U_\varepsilon(0)$ atrofida ketma-ketlikning cheksiz ko'p hadi joylashib uning tashqarisida cheklita hadi qolishini ko'rsatish kerak. ε ga turli qiymatlar berib, ushbu jarayonni kuzatish uchun quyidagi havolaga o'ting: <http://localhost:5173/theme2>

18.2-misol. Ketma-ketlik limiti ta'rifining inkori, ya'ni (18.3) munosabat bo'yicha $a = 1$ soni $x_n = \sin \frac{n\pi}{2}$ ketma-ketlikning limiti bo'lmavligini ko'rsating.

Yechish. $\varepsilon_0 = \frac{1}{2}$ deb olamiz, u holda $\forall n_0 \in N$ son uchun $n = 2n_0$ deb olsak, $n > n_0$ bo'lgan n natural son mavjud va

$$|x_n - a| = \left| \sin \frac{2n_0\pi}{2} - 1 \right| = |\sin(n_0\pi) - 1| = 1 > \frac{1}{2}$$

munosabat bajariladi. Demak, (18.3) munosabatga ko'ra $a = 1$ soni $x_n = \sin \frac{n\pi}{2}$ ketma-ketlikning limiti emasligini aniqlaymiz.

18.3-misol. $x_n = \{(-1)^n\}$ ketma-ketlikni yaqinlashuvchilikka tekshiring.

x_1	x_2	x_3	x_4	x_5, \dots, x_n, \dots
-1	1	-1	1	-1 ... $(-1)^n$...

Faraz qilaylik 1 nuqta bu ketma-ketlikning limiti bo'lsin, u holda 1 nuqtaning $\forall \varepsilon$ atrofida ketma-ketlikning cheksizta elementi joylashgan bo'lishi tashqarisida esa cheklita elementi joylashgan bo'lishi kerak. $(1 - \frac{1}{2}; 1 + \frac{1}{2})$ atrofini olaylik, bu atrofi x_n ketma-ketlikning hamma juft nomer hadlari joylashgan lekin bu nuqtaning tashqarisida barcha toq nomerli hadlari qolayapti. Demak 1 nuqta ketma-ketlikning limiti bo'la olmaydi. -1 nuqta ham xuddi shunday limiti bo'la olmasligini osongina ko'rish mumkin. 1 va -1 dan farqli istalgan $a \in R$ soni uchun, uning shunday $U_\varepsilon(a) = (a - \varepsilon, a + \varepsilon)$ atrof topilib, $1 \notin U_\varepsilon(a)$, $-1 \notin U_\varepsilon(a)$ va $U_\varepsilon(a)$ atrofda qaralayotgan ketma-ketlikning bironta ham elementi yotmasligini ko'rish qiyin emas. Shuning uchun bu tanlangan nuqta ham bu ketma-ketlikning limiti bo'la olmaydi. Demak, bu ketma-ketlik limitga ega emas ekan.

4.O'z-o'zini tekshirish savollari.

1. Sonli ketma-ketlik limitining ta'rifini atroflar yordamida bering.
2. $x_n = (-1)^n$ ketma-ketlikning limiti mavjud emasligini " $\varepsilon - \delta$ " tilida ko'rsating.
3. $x_n = \frac{1}{n}$ ketma-ketlik limitining mavjudligini " $\varepsilon - \delta$ " tilida ko'rsating.
4. Logik simvollar yordamida quyidagi mulohazalarning inkorini yozing.
 - a) $A = \{a \text{ soni} - \{x_n\} \text{ ketma-ketlik limiti}\}.$
 - b) $B = \{\{x_n\} \text{ ketma-ketlik yaqinlashuvchi ketma-ketlikdir}\}.$

5.Mustaqil yechish uchun misollar.

18.1. Ketma-ketlik limitining ta'rifi (18.1-ta'rif) bo'yicha a soni $\{x_n\}$ ketma-ketlikning limiti bo'lishini isbotlang.

1. $\lim_{n \rightarrow \infty} x_n = a, \quad x_n = \frac{3n-2}{2n-1}, \quad a = \frac{3}{2}.$
2. $\lim_{n \rightarrow \infty} x_n = a, \quad x_n = \frac{4n-1}{2n+1}, \quad a = 2.$

$$3. \lim_{n \rightarrow \infty} x_n = a, \quad x_n = \frac{5n+1}{10n-3}, \quad a = \frac{1}{2}. \quad 4. \lim_{n \rightarrow \infty} x_n = a, \quad x_n = \frac{3n^2}{2-n^2}, \quad a = -3.$$

$$5. \lim_{n \rightarrow \infty} x_n = a, \quad x_n = \frac{2n}{n^3+1}, \quad a = 0. \quad 6. \lim_{n \rightarrow \infty} x_n = a, \quad x_n = \frac{2n+3}{n+5}, \quad a = 2.$$

$$7. \lim_{n \rightarrow \infty} x_n = a, \quad x_n = \frac{1-2n^2}{n^2+3}, \quad a = -2. \quad 8. \lim_{n \rightarrow \infty} x_n = a, \quad x_n = \frac{(-1)^{n+1}}{n}, \quad a = 0.$$

Bu har bir hol uchun quyidagi jadvalni to'ldiring:

ε	0,1	0,01	0,001	...
$n_0(\varepsilon)$				

18.2. Ketma-ketlik limiti ta'rifining inkori ((18.3) munosabat) bo'yicha a soni $\{x_n\}$ ketma-ketlikning limiti bo'lmashligini korsating.

$$1. a = -1, x_n = (-1)^n. \quad 2. a = \frac{1}{2}, x_n = \frac{1}{2n+1}.$$

$$3. a = 1, x_n = (-1)^n + 1. \quad 4. a = \frac{1}{2}, x_n = \cos \frac{\pi n}{3}.$$

$$5. a = \frac{1}{2}, x_n = \sin \frac{\pi n}{6}. \quad 6. a = -\frac{1}{2}, x_n = \frac{n+1}{3-2n^2}.$$

18.3. $x_n = \frac{1}{n^2} (1 + 2 + 3 + 4 + \dots + n)$ ketma-ketlikni yaqinlashuvchilikka tekshiring.